

# INCIPIIT AURORA, QUÆ ANTE PRIMAM RECITATUR IN DIEBUS FERIIS PER TOTUM ANNUM.

**Antiphona.** Deus in adjutorium meum intende:  
Domine ad adjuvandum me festina.

**Psalmus 69.**

Deus in adjutorium meum intende. folio XXVIII.

**118. Psalmus David.**

Beati immaculati in via. In quo corrigit juvenior  
viam suam. Retribue servo tuo, vivam: fol. LII.

**Reiteretur Antiphona.** Deus in adjutorium meum  
intende: Domine ad adjuvandum me festina.

**Dicat Presbyter.** Dominus sit semper vobiscum. **R̃.**  
Et cum.

**Lauda.** Alleluia, alleluia, alleluia. Præveni in ma-  
turityte, & clamavi: quia in verbo tuo supersperavi.

**P.** Alleluia. **Ÿ.** Prævenierunt oculi mei, Deus, ad te  
diluculo: ut meditarer eloquia tua. **P.** Alleluia.

**Hymnus.**

**J**Am meta noctis transiit,  
Somni quies jam præteriit,  
Aurora surgit fulgida,  
Spargit cælum lux nova.

**Sed** cum diei speculum  
Cernamus hinc nos omnes,  
Ad te, superne Lucifer,  
Preces necesse est fundere.

**Te** lucis Sancte Spiritus,  
Et charitatis actibus  
Ad instar illud gloriæ  
Nos innovatos effice.

**Præsta,** Pater Piissime,  
Patrique compar Unice,  
Cum Spiritu Paraclito  
Regnans per omne sæculum.  
Amen.

**Ÿ.** Exurge, Domine, adjuva nos; & libera nos  
propter nomen tuum.

**Vel alius Vers.** A vigilia matutina usque ad noctem,  
Deus sancte, custodi nos.

**Alius Vers.** Adjutor, & liberator noster es tu  
Domine, ne tardaveris ad salvandum nos.

Kyrie eleison. Christe eleison. Kyrie eleison. Pa-  
ter noster, qui es in cœlis: **R̃.** Amen. Sanctificetur  
nomen tuum: **R̃.** Amen. Adveniat regnum tuum: **R̃.**  
Amen. Fiat voluntas tua, sicut in cœlo, & in terra.

**R̃.** Amen. Panem nostrum quotidianum da nobis  
hodie: **R̃.** Quia Deus es. Et dimitte nobis debita  
nostra, sicut & nos dimittimus debitoribus nostris.

**R̃.** Amen. Et ne nos inducas in tentationem: **R̃.** Sed  
libera nos a malo.

A malo nos libera, & in tuo timore, & opere bono  
nos confirma Trinitas Deus noster; tibi que serviamus  
Deo, ac Domino nostro servitute perenni: Qui vivis,  
& omnia regis nunc, & in æterna sæcula sæculorum.  
**R̃.** Amen.

**Preces.** Deus miserere, Deus miserere: Deus mis-  
erere infirmis, oppressis, dispersis, captivis, itiner-  
antibus, navigantibus, tribulantibus, pœnitentibus;  
& defunctis fidelibus cito succurre, Pater Cœlestis.

**Aliæ Preces.** Deus miserere, Deus miserere, Deus  
miserere: Miserere nobis, Domine, miseris: Mis-  
erere famulis tuis; Miserere infirmis, miserere oppres-  
sis, miserere captivis, miserere peregrinis, miserere pœni-  
tentibus, miserere lugentibus, miserere peccatoribus:  
Tu Christe parce Christianis viventibus cunctis; quo-  
niam meritorum nostrorum diversis atterimur malis:  
& quia coram te propriam fatemur miseriam, mis-  
ericordiæ tuæ opem in nobis sentiamus; & operum  
medelam & requiem jubeto præstare omnibus fi-  
delibus defunctis. Amen.

## INCIPIIT ORDO PRIMÆ, QUÆ DEBET DICI PER TOTUM ANNUM.

**Antiphona.** Prævenierunt oculi mei, Deus, ad te dilu-  
culo: ut meditarer eloquia tua. 2. Prævenierunt.  
Gloria, & honor. 3. Prævenierunt. **Psalmus 66.**  
**Psalmus 144. Psalmus 144.**

Regnum tuum, Domine, regnum, &c. **Psalmus 112.**

**118. Psalmus David.**

Adhæsit pavimento anima mea. Legem pone mihi  
Domine. Veniat super nos misericordia tua, Domine.  
fol. LII. & LIII.

**Antiphona.** Prævenierunt oculi mei, Deus, ad te dilu-  
culo: ut meditarer eloquia tua.

**Responsorium diebus ferialibus.**

Adjutor, & liberator noster es tu, Domine. *Ÿ*. Deus in nomine tuo saluum me fac: & in virtute tua iudica me. *P*. Es tu, Domine. *Ÿ*. Gloria, & honor Patri, & Filio, & Spiritui Sancto: & nunc, & semper in sæcula sæculorum. Amen. *P. Reiteretur Responsorium.* Adjutor, & liberator.

*Responsorium aliud feriale.*

Adjuva nos Deus salutaris noster: *Ÿ*. Et propter honorem nominis tui Domine libera nos. *P*. Salutaris noster. *Ÿ*. Gloria, & honor. *P*. Adjuva nos, &c.

*De Confessore Responsorium.*

In conspectu Angelorum psallam tibi, Domine Alleluia: *Ÿ*. Adorabo ad templum sanctum tuum, & confitebor tibi, Domine. *P*. Psallam. *Ÿ*. Gloria, & honor.

*Responsorium de uno justo sive Martyre.*

De ore iusti procedit doctrina Alleluia, alleluia: Favum mellis distillant labia ejus. *Ÿ*. Os iusti meditabitur sapientiam, & lingua ejus loquetur iudicium. *P*. Favum mellis. *Ÿ*. Gloria, & honor. *Reiteretur R.*

*De Sanctis sive de Martyribus Responsorium.*

Vincula Sanctorum jam soluta sunt; & plagæ eorum jam sanatæ sunt: quasi navigantes de mundo ferebantur in cælum. *Ÿ*. Qui sunt isti, qui ut nubes volant, & quasi columbæ ad fenestras suas? *P*. Ferebantur. *Ÿ*. Gloria, & honor.

*In Quadragesima diebus Feriis Responsorium.*

Quærite primum regnum Dei: & hæc omnia apponentur vobis. *Ÿ*. Quærite Dominum, & confortamini: quærite faciem ejus semper. *P*. Et hæc omnia. *Ÿ*. Gloria. *P*. Quærite.

*In Quadragesima diebus Dominicis Responsorium.*

Servi Dei benedicite Dominum, & collaudate regem sæculorum. Quia oportet semper orare & nunquam deficere. *Ÿ*. Qui statis in domo Domini, in atriis domus Dei nostri. *P*. Quia oportet. *Ÿ*. Gloria.

*De Adventu Domini Responsorium.*

Montes filiæ Sion ramos vestros extendite, & germinate, & fructum jocunditatis afferte populo Dei Israel: quoniam veniet dies Domini. *Ÿ*. Laudate cœli, & exulta terra, jubilate montes laudem: *Ÿ*. Et fructum jocunditatis. *P*. Gloria.

*De Nativitate Domini Responsorium.*

Splendet hodie cælum, & terra: quia Salvator nobis natus est ad redimendum peccata nostra. Ipse est Dominus Deus noster. *Ÿ*. Parvulus enim natus est nobis, & filius datus est nobis: *P*. Ipse est Dominus. *Ÿ*. Gloria, & honor. *Reiteretur R.*

*In diebus festivis per totum annum Responsorium.*

Lux tua, Domine, luceat super nos: & majestas tua illuminet nos Alleluia: Ut spiritu tuo repleti, non timeamus insidias inimici Alleluia, alleluia. *Ÿ*. Illumina, Domine, vultum tuum super nos, & miserere nobis. *P*. Ut spiritu tuo repleti. *Ÿ*. Gloria, & honor. *P*. Lux tua, Domine, &c. *Vel dicatur istud Responsorium in Octavis Nativitatis.*

*Lectio libri Zachariæ Prophetæ. Cap. 8.*

**H**æc dicit Dominus: Reversus sum ad Sion, & habitabo in Hierusalem: & vocabitur Hierusalem Civitas veritatis, & Mons Domini exercituum mons sanctificatus. *R.* Amen.

*Epistola Pauli Apostoli ad Romanos. Cap. 13.*

**F**ratres, Nox præcessit, dies autem appropinquavit. Abjiciamus ergo a nobis opera tenebrarum, & induamus nos arma lucis. Sicut in die honeste ambulemus: non in comessionibus, & ebrietatibus, non in cubilibus, & impudiciis, non in contentione, & æmulatione: sed induimini Dominum nostrum Jesum Christum. *R.* Amen.

*Lauda.* Alleluia. Cantabo Domine in vita mea *P*. Alleluia: *Ÿ*. Psallam Deo meo quandiu ero. *P*. Alleluia.

*Lauda.* Alleluia, Dextera Domini fecit virtutem *P*. Alleluia: *Ÿ*. Dextera Domini exaltavit nos. *P*. Alleluia, alleluia.

*Et nota, quod in tempore Quadragesimæ non dicitur Alleluia in ista Lauda.*

*Hymnus.*

**J**am lucis orto sidere  
Deum precemur supplices,  
Ut in diurnis actibus  
Nos servet a nocentibus.

Linguam refrænans temperet,  
Ne litis error insonet:  
Visum fovendo contegat,  
Ne vanitates hauriat.

Sint pura cordis intima,  
Absistat & vecordia:  
Carnis terat superbiam  
Potus cibique parcitas:

Ut, cum dies abscesserit,  
Noctemque sors reduxerit,  
Mundi per abstinentiam  
Ipsi canamus gloriam.

Iam nos secundæ præmonet  
Horæ peractus circulus,  
Deo sacratum promere  
Hymnum perennis gloriæ.

Exurge Jesu alleluia

Cordis rei fastidia;  
Ut lingua clare concinat  
Laudis tuæ magnalia.

Infunde lumen Spiritus,  
Da claritatem cordibus;  
Quo te Deum per omnia  
Laudemus semper sæcula. Amen.

Ÿ. Bonum est confiteri Domino, P. Et psallere nomi-  
mini tuo Altissime.

#### De Resurrectione Responsorium.

Dicite in nationibus Alleluia: Dominus regnavit a  
ligno Alleluia, alleluia. Ÿ. Etenim correxit orbem  
terræ, quæ non commovebitur. P. Dominus regnavit.

Ÿ. Gloria, & honor. Reiteretur Dicite.

#### Hymnus.

**A** Urora lucis rutilat:  
Cælum laudibus intonat:  
Mundus exultans jubilat:  
Gemens infernus ululat.  
Cum Rex ille fortissimus,  
Mortis confractis viribus,  
Pede conculcans tartara  
Solvit a pœna miseros.  
Ille, qui clausus lapide  
Custoditur sub milite;  
Triumphans pompa nobili,  
Victor surgit de funere.  
Solutis jam gemitibus,  
Et inferni doloribus:  
Quia surrexit Dominus,  
Resplendens clamat Angelus.

Tristes erant Apostoli  
De nece sui Domini,  
Quem pœna mortis crudeli  
Servi damnarunt impii.

Sermone blando Angelus  
Prædixit mulieribus:  
In Galilæa Dominus  
Videndus est quantocius.

Illæ dum pergunt concitæ,  
Apostolis hæc dicere:  
Videntes eum vivere,  
Osculant pedes Domini.

Quo agnito Discipuli  
In Galilæam propere  
Pergunt, videre faciem  
Desideratam Domini.

Claro paschali gaudio  
Sol mundo nitens radio,  
Cum Christum jam Apostoli

Visu cernunt corporeo.

Ostensa sibi vulnere  
In Christi carne fulgida,  
Resurrexisse Dominum,  
Voce fatentur publica.

Rex Christe clementissime,  
Tu corda nostra posside;  
Ut tibi laudes debitas  
Reddamus omni tempore.

Gloria tibi, Domine,  
Qui surrexisti a mortuis,  
Cum Patre, Sancto Spiritu  
In sempiterna sæcula. Amen.

Ÿ. Bonum est confiteri Domino, P. Et psallere nomi-  
mini tuo Altissime.

Et istud, quod sequitur, videlicet Canticum  
Benedictus Dominus Deus. Et Psalmus 50. debet  
semper dici per totum annum in diebus Ferialibus,  
excepto tempore Resurrectionis.

Canticum. Benedictus es Domine Deus patrum nos-  
trorum. fol. 5. Psalmus 50.

Et nota, quod in diebus Dominicis, & festivis de-  
bet semper dici Canticum Te Deum laudamus. Et  
Canticum Gloria in excelsis, Et Symbolum Credimus  
in unum Deum.

#### Canticum.

**T**E Deum laudamus; te Dominum confitemur;  
Te æternum Patrem omnis terra veneratur.  
Tibi omnes Angeli, tibi Cœli, & universæ potestates:  
Tibi Cherubim ac Seraphim incessabili voce procla-  
mant:  
Sanctus, Sanctus, Sanctus, Dominus Deus Sabaoth.  
Pleni sunt cœli & terra gloria majestatis tuæ.  
Te gloriosus Apostolorum chorus;  
Te prophetarum laudabilis numerus;  
Te Martyrum candidatus laudat exercitus.  
Te per orbem terrarum sancta confitetur Ecclesia  
Patrem immensæ majestatis,  
Ad venerandum tuum verum unigenitum Filium,  
Sanctum quoque Paraclitum Spiritum.  
Tu es Rex gloriæ Christe.  
Tu Patris sempiternus es Filius:  
Tu ad liberandum suscepturus hominem, non hor-  
ruisti Virginis uterum:  
Tu, devicto mortis aculeo, aperuisti credentibus te  
regna cœlorum:  
Tu ad dexteram Dei sedes in gloria Patris:  
Judex crederis esse venturus.  
Te ergo quæsumus; tuis famulis subveni, quos pre-  
tioso sanguine redemisti:

Æterna fac cum sanctis tuis in gloria munerari.  
Salvum fac populum tuum Domine; & benedic hereditati tuæ:

Et rege eos: & extolle illos usque in sæculum & in sæcula sæculorum. Amen.

Per singulos dies benedicimus te:

Et laudamus nomen tuum in æternum & in sæculum sæculi.

Dignare, Domine, die isto: sine tribulatione & peccato nos custodire.

Miserere nobis, Domine, miserere nobis.

Fiat misericordia tua, Domine, super nos; sicut speravimus in te.

In te Domine speravi, non confundar in æternum.

Parce, Domine, parce populo tuo: & ne des in obprobrium hereditatem tuam.

### Canticum Angelorum.

**G**Loria in excelsis Deo: Et in terra pax hominibus bonæ voluntatis. Laudamus te, Benedicimus te, Adoramus te, Glorificamus te: Hymnum dicimus tibi: Gratias tibi agimus propter gloriam tuam magnam, Domine Deus Rex cœlestis Deus Pater omnipotens, Domine Fili unigenite Jesu Christe Altissime. Domine Deus, agnus Dei, Filius Patris, Qui tollis peccata mundi, miserere nobis. Qui tollis peccata mundi, suscipe deprecationem nostram. Qui sedes ad dexteram Patris, miserere nobis. Quoniam tu solus sanctus, Tu solus Dominus, Tu solus Altissimus, Jesu Christe, Cum Sancto Spiritu in gloria Dei Patris. Amen.

### Symbolum Apostolorum.

**C**Redimus in unum Deum, Patrem omnipotentem, Factorem cœli & terræ, visibilium & invisibilium conditorem. Et in unum Dominum Jesum Christum, Filium Dei unigenitum, Ex Patre natum ante omnia sæcula, Deum ex Deo, Lumen ex lumine, Deum verum ex Deo vero, Natum, non factum, (Homousion Patri; hoc est, ejusdem cum Patre substantiæ:) per quem omnia facta sunt, quæ in cœlo, & quæ in terra: Qui propter nos homines, & propter nostram salutem descendit de cœlis, \* Et incarnatus est de Spiritu Sancto: natus ex Maria Virgine: homo factus est. Passus sub Pontio Pilato: Sepultus: Tertia die resurrexit: Ascendit in cœlos: sedet ad dexteram Patris; Iterum venturus est in gloria judicare vivos & mortuos: cujus regni non erit finis. Credimus in Spiritum Sanctum, Dominum & vivificantem, ex Patre, & Filio procedentem, Cum Patre, & Filio simul adorandum, & glorificandum: qui locutus est per Prophetas; In unam sanctam catholicam

atque Apostolicam Ecclesiam. Confitemur unum baptisma in remissionem peccatorum. Expectamus resurrectionem mortuorum, Et vitam futuri sæculi. Amen.

Ÿ. Satiati sumus mane misericordia tua: & exultavimus, & lætati sumus in omnibus diebus nostris.

### Supplicatio.

**O** Remus pium & exaudibilem Dominum nostrum Jesum Christum, cum omni supplicatione rogemus; ut nostri agonis cursum ad finem bonorum operum, & supernæ beatitudinis propitius perducere dignetur. **R.** Præsta æterne omnipotens Deus. Kyrie eleison. **R.** Christe eleison. Kyrie eleison.

### Capitula 3. in diebus Festivis.

**D**eus ad adjuvandum nos festina; ne aut inimicus prævaleat, dum differt adjutorium; aut desperatio succedat, dum retardas auxilium: utramque tuam opitulationem oppone; & piam cautionem nobis, & omnibus Christianis impende: ut qui fiduciam nostram in tua collocamus virtute, semper tua muniamur Divinitate.

Pater noster.

A malo nos libera. fol. 9.

### Benedictio.

**B**enedicat nos Dominus rector æternus. **R.** Amen. Protegat, muniat, & ab omni malo defendat; **R.** Amen. Ut ereptos a malis heredes constituat in cœlis. **R.** Amen. Per misericordiam ipsius.

### Capitula Ferialis.

**D**eus, in adjutorium nostrum intende; Domine, & ut nos adjuves, festinans aggredere: tribue itaque vires explendi quod novimus, & perfectioni deputa quod optamus.

Pater noster.

A malo nos libera. fol. 9.

### Benedictio.

**S**it veritas, & misericordia divina nobiscum; ut superare valeamus in bonis actibus inimicum. **R.** Amen. Exultet in suo beneficio cor nostrum, ut decidant a nobis cuncta vulnera delictorum. **R.** Amen. Dextera ejus imbuat miseratoris triumphum, quo veterinosi hostis, Christo gubernante, contraemus aculeum. **R.** Amen.

### Capitula Dominicalis.

**A**D te, Domine, effundimus desiderium cordis nostri; cum lachrymis precamur, ut audias vocem nostri clamoris, & effectum dona petitionibus

nostris: Estoque nobis, Domine, in omnibus bonis adiutor promptissimus, in periculis liberator assiduus: pelle a nobis dolum, interime vitium. Præsta alternæ dulcedinis incrementum. Sit nobis correptio morum indulgentia criminum; ut orationem nostram accipias; peccata dimittas; fide repleas; indulgentia foveas; misericordia protegas; adversa destruas; prospera concedas; habeamus in hoc sæculo bonæ actionis documentum; castitatis donum; charitatis studium; sancti amoris affectum; & in futuro cum sanctis Angelis adipiscamur regnum; & propter magnam misericordiam tuam defunctis omnibus fidelibus Christianis sempiternam requiem dona.

Pater noster.

A malo nos libera. fol. 9.

#### Benedictio.

**B**enedicat nos omnipotens Dominus cœlestibus bonis, & repleat spiritualibus donis. *R.* Amen. Concedat nobis charitatem, gaudium, patientiam, mansuetudinem, spem, fidem, & continentiam; *R.* Amen. Ut repleti omnes bonis ejus, ad æternam vitam beatitudinis pervenire possimus. *R.* Amen. Per misericordiam tuam.

### INCIPIT ORDO CANTANDUS VEL RECITANDUS AD TERTIAM.

*Antiphona.* Præoccupemus faciem ejus in confessione: & in psalmis jubilemus ei. *Psalmus 94.*

#### 118. Psalmus David.

*Memento verbi tui servo tuo.* Portio mea, Domine. Jucunditatem fecisti cum servo tuo. fol. LIII.

*Antiphona.* Præoccupemus faciem ejus in confessione: & in psalmis jubilemus ei.

#### In diebus Festivis Responsorium.

Defensor juste, defende nos: & libera nos de manu inimicorum nostrorum. *Ÿ.* Deus in nomine tuo salvos nos fac: & in virtute tua *P.* Libera nos de manu. *Ÿ.* Gloria, & honor. *Reiteretur Responsorium.*

#### In diebus Ferialibus Responsorium.

Da nobis, Deus, auxilium in tribulatione: quia vana est salus hominis. *Ÿ.* In Deo faciemus virtutem: & ipse ad nihilum deducet tribulantes nos. *P.* Quia vana est. *Ÿ.* Gloria, & honor.

#### In Quadragesima diebus Feriis Responsorium.

Deprecemur Dominum: & placabilis erit nobis. Et exaudiet nos, & miserebitur nobis. *Ÿ.* Venite, exultemus Domino: jubilemus Deo salutari nostro. *P.* Et exaudiet nos. *Ÿ.* Gloria, & honor.

*In diebus Dominicis carnalibus Responsorium.* Misericordiam, & judicium cantabo tibi Domine: Alleluia, alleluia. *Ÿ.* Perambulabam in innocentia cordis mei, in medio domus tuæ. *P.* Cantabo tibi, Domine. Alleluia, alleluia. *Ÿ.* Gloria, & honor. *Reiteretur Responsorium.*

Lectio libri Levitici. *Capitulo 26.*

*R.* Deo gratias.

**H**æc dicit Dominus: Ponam tabernaculum meum in medio vestri, & non abjiciet vos anima mea. Habitabo inter vos, & ero vester Deus, vosque eritis populus meus, & ego Dominus Deus vester. *R.* Amen.

Epistola Pauli Apostoli ad Ephesios. *Cap. 5.*

*R.* Deo gratias.

**F**ratres, Estote imitatores Dei, sicut filii charissimi: & ambulate in dilectione, sicut & Christus dilexit nos, & tradidit semetipsum pro nobis oblationem, & hostiam Deo in odorem suavitatis. *R.* Amen.

*Lauda.* Alleluia, alleluia. Magnus Dominus noster, & magna virtus ejus: *P.* Alleluia. *Ÿ.* Et sapientiæ ejus non est numerus. *P.* Alleluia.

*Lauda.* Alleluia, alleluia, alleluia. Deus exaudi orationem nostram *P.* Alleluia, alleluia: *Ÿ.* Et clamor noster ad te perveniat. *P.* Alleluia, alleluia.

*Et nota, quod in tempore Quadragesimæ non dicitur Alleluia in ista Lauda.*

#### Hymnus.

**C**ertum tenentes ordinem,  
Pio poscamus pectore  
Hora diei Tertia  
Virtutem trini numinis.

*Ut* simus habitaculum  
Illi Sancto Spiritui.  
Qui quondam in Apostolis  
Hac hora distributus est:

*Quo* gradientes ordine,  
Ornavit cuncta splendide  
Regni cœlestis Conditor  
Æternæ vitæ præmiis.

Præsta, Pater piissime,  
Patrique compar Unice,  
Cum Spiritu Paraclito  
Regnans per omne sæculum. Amen.

*Clamores.* 1. Non secundum peccata nostra facias nobis, Deus: neque secundum iniquitates nostras retribuas nobis. 2. Non secundum. 3. Non secundum peccata. *Ÿ.* Sed secundum multitudinem miserationum tuarum miserere nobis, Domine.

#### Supplicatio.



**O** Remus pium & exaudibilem Dominum nostrum Jesum Christum, cum omni supplicatione rogemus; ut nobis gratiam misericordiæ suæ, & delictorum veniam propitius donare dignetur. *R.* Præsta æternæ. Kyrie eleison. *R.* Christe eleison. Kyrie eleison.

#### Capitula.

**D**omine Jesu Christe, Fili Dei Patris, qui hora diei Tertia in Crucis suspensus patibulo, totius mundi delictum tuo abluisti supplicio; eodemque horæ curriculo super capita Apostolorum tuorum igne Sancti Spiritus dedisti donum: te quæsumus, & rogamus, ut eo munere corda nostra irradies, & animas benedicas.

Pater noster.

#### Benedictio.

**B**enedicat nos trina majestas, & una Deitas: *R.* Amen. Pater & Filius, & Spiritus Sanctus. *R.* Amen. Tales nos dies examinationis inveniatur, quales fons regenerationis emisit. *R.* Amen.

#### De Adventu Domini Responsorium.

Veniet Dominus, & apparebit in medio filiorum populi sui. De manu impiorum liberabit eos, & de morte redimet illos. *Ÿ.* Dominus omnipotens suscitabit justum nobis. Et ipse salvum faciet populum suum a peccatis eorum. *P.* Et de manu impiorum liberabit eos. *Ÿ.* Gloria, & honor. *Reiteretur Responsorium.*

#### ALIU D.

Ecce Dominus veniet, Redemptor noster sanctus Israel, Coronam regni habens in capite suo. *Ÿ.* Attendite ad me populus meus: & tribus mea me audite: quia prope est justus meus, & egressus est Salvator meus, *P.* Coronam regni habens in capite suo.

#### ALIU D.

*Ÿ.* Aspiciebam in nubibus Cœli: & quasi Filius hominis veniebat, *P.* Coronam regni. *Ÿ.* Gloria, & honor. *Reiteretur.*

*Responsorium.* Quare tardas, Deus? Veni: & libera populum tuum; te enim expectat omnis Israel. *Ÿ.* Veni, Domine, noli tardare: relaxa facinora plebis tuæ; *P.* Te enim expectat. *Ÿ.* Gloria, & honor.

Lectio libri Esaiæ Prophetæ. *Capitula* 35.

*R.* Deo gratias.

**H**æc dicit Dominus: Lætabitur deserta & invia, & exultabit solitudo, & florebit quasi liliū. Germinans germinabit, & exultabit lætabunda & laudans: gloria Libani data est ei: decor Carmeli, & Saron; ipsi videbunt gloriam Domini, & decorem Dei nostri. *R.* Amen.

Epistola Pauli Apostoli ad Philippenses. *Capitula* 4.

*R.* Deo gratias.

**F**ratres, Gaudete in Domino semper: & iterum dico gaudete. Modestia vestra nota sit omnibus hominibus: Dominus prope est. Nihil solliciti sitis: sed in omni oratione, & obsecratione, cum gratiarum actione, petitiones vestræ innotescant apud Deum. Et pax Christi, quæ exuperat omnem sensum, custodiat corda, & corpora vestra, & intelligentias vestras, per fidem, quæ est in Christo Jesu Domino nostro. *R.* Amen.

*Lauda.* Alleluia, alleluia. Veni, Domine, & appare populo tuo: *P.* Alleluia. *Ÿ.* Et relaxa facinora eorum. *P.* Alleluia.

#### Hymnus.

**T**E majestatis Domine,  
Trino colentes nomine,  
Precamur tui famuli;  
Libens ut nos exaudias.

*Errata nostra dilue;*  
Vocem clamoris accipe;  
Largire te fatentibus  
Regni cœlestis præmia.

*Præsta, Pater piissime,*  
Patrique compar Unice,  
Cum Spiritu Paraclito  
Regnans per omne sæculum. Amen.

*In Tempore Spiritus Sancti.* Gloria tibi Trinitas.  
*fol. XX.*

#### Supplicatio.

**O** Remus pium, & exaudibilem Dominum nostrum Jesum Christum, cum omni supplicatione rogemus; ut nos gratia adventus sui nobis de die in diem cor novum, & spiritum rectum propitius innovare dignetur. *R.* Præsta æternæ omnipotens Deus.

#### Capitula.

**T**ertia jam, Domine, diei surgit hora, in qua Spiritum Sanctum in Apostolorum cordibus infundere dignatus es; & ut variis loquerentur in linguis, eorum faucibus resonasti: Præsta ergo, æternæ omnipotens Deus, ut sicut in eodem tempore os eorum in tuis laudibus apperuiisti; ita quoque nos in futuro tuam misericordiam consequi mereamur.

Pater noster.

#### Benedictio.

**C**ustodiat nos Dominus; ubique præcedat: & suorum mandatorum observatores efficiat; *R.* Amen. Quique ad exorandum eum in hac hora diei Tertia devota mente concurrimus, occursum, atque subsidium semper habere mereamur ineffabile Trinitatis; *R.* Amen. Ut ejus protectione salvati cum eodem Domino in æterna sæcula mereamur lætari. *R.* Amen.

*In Quadragesima Responsorium.*

**E**cce venient dies Domini magni, eleemosynæ, & jejunii: estote parati benefacere oppressis, viduis, & orphanis; ut recipiatis mercedem in novissimis temporibus, dicit Dominus. *Ps.* Quiescite agere perverse: discite benefacere: quærite judicium: subvenite oppressis; *P.* Ut recipiatis. *Ps.* Gloria, & honor. *Reiteretur Responsorium.*

*Lectio libri Esaiæ Prophetæ. Capitulo 55.*

*R.* Deo gratias.

**I**n illis diebus: Locutus est Esaias dicens: Quærite Dominum, dum inveniri potest: invoke eum, dum prope est. Derelinquat impius vias suas, & vir iniquus cogitationes suas, & revertatur ad Dominum, & miserebitur ejus, & ad Dominum Deum nostrum: quoniam multus est ad ignoscendum. *R.* Amen.

*Epistola Pauli Apostoli ad Ephesios. Capitulo 4.*

*R.* Deo gratias.

**F**ratres, Omnis sermo malus de ore nostro non procedat: sed si quid bonum est ad ædificationem opportunitatis, ut det gratiam audientibus. Et nolite contristari Spiritum Sanctum Dei: in quo signati estis in diem redemptionis. *R.* Amen.

*Lauda.* Laus tibi, laus tibi, Domine, Rex æternæ gloriæ. Deus exaudi orationem nostram, *P.* Rex æternæ gloriæ. *Ps.* Et clamor noster ad te perveniat, *P.* Rex æternæ gloriæ.

*Hymnus.*

**B**enignitatis fons Deus,  
Qui non habes finem boni,  
Super malum scelestium  
Semper pius, semper bonus.

*M*œstum satis cor cædimus,  
Et triste pectus tundimus:  
Aguas pupillæ fundimus:  
Mœstas genas inducimus.

*E*gisce multum poenitet  
Horrens tetrum, vel pessimum,  
Turpissimumque sordidum;  
Fatemur omne noxium.

*E*lata vox te postulat:

Tu parce, dicit, Conditor;  
Jam parce, clamat obsecrans:  
Ignosce quod commissimus.

*N*on ira mœstos sorbeat;  
Non poena fessos conterat:  
Solare contritos cito,  
Et gaudium nobis dato.

*P*ræsta, Pater piissime,  
Patrique compar Unice,  
Cum Spiritu Paraclito  
Regnans per omne sæculum. Amen.

*Clamores.* 1. Non secundum peccata nostra facias nobis, Deus: neque secundum iniquitates nostras retribuas nobis. 2. Non secundum. 3. Non secundum. *Ps.* Sed secundum multitudinem miserationum.

*Supplicatio.*

**O** Remus pium, & exaudibilem Dominum nostrum, *ut supra.*

*Capitula.*

**E**xaudi orationem nostram, Domine; gemitusque nostros auribus percipe: nos enim iniquitates nostras agnoscimus; & delicta nostra coram te pandimus: tibi, Deus, peccavimus; tibi que confidentes veniam exposcimus: Et quia recessimus a mandatis tuis, & legi tuæ minime paruimus; convertere Domine super servos tuos, quos redemisti sanguine tuo: Indulge quæsumus nobis; & peccatis nostris veniam tribue: tuæque pietatis misericordiam in nobis largiri dignare.

Pater noster.

*Benedictio.*

**D**eus, qui est fons indulgentiæ, suscipiat litationem abstinentiæ nostræ; *R.* Amen. Quique est Omnipotens & substantia Divinitatis, det posse parere præceptis. *R.* Amen. Et quod non possumus carnali ex infirmitate perficere, ipsius Divinitate adjuti mereamur adimplere. *R.* Amen.

*De Traditione Domini Responsorium.*

Miserere, quia Deus es: misericors, miserere; quia peccavimus tibi. *Ps.* Ad te levamus oculos nostros, qui habitas in cœlis. *P.* Misericors, miserere.

*Aliud Responsorium.*

Quot sunt dies servi tui, Domine: quando facies de persequentibus me judicium? *Ps.* Posuerunt peccatores laqueos mihi: & a mandatis tuis non erravi. *P.* Domine, quando facies.

*Lectio libri Hieremiæ Prophetæ. Capitulo 9.*

**R.** Deo gratias.

**H**æc dicit Dominus: Ecce ego conflabo, & combprobabo inimicos meos: quid enim aliud faciam a facie filii populi mei? Sagittæ vulnerantes lingua eorum; dolum locuta est in ore eorum: pacem cum amico suo loquitur, & occulte ponit ei insidias. Numquid super his non visitabo, dicit Dominus? Si quis est vir sapiens, qui intelligit hoc, ad quem verbum Domini fiat, annuntiet istud, ait Dominus omnipotens. **R.** Amen.

Epistola prima Joannis Apostoli ad Gentes.

*Capitulo 2.*

**R.** Deo gratias.

**C**harissimi, Nolite diligere mundum, neque ea, quæ in mundo sunt. Si quis diligit hunc mundum, non est charitas Patris in eo: quoniam omne, quod est in mundo, concupiscentia carnis, & concupiscentia oculorum est, & superbia vitæ: qui vero ex hoc mundo est, & mundus transit, & concupiscentia ejus. Qui autem facit voluntatem Dei, manet in æternum, quomodo Deus manet in æternum. **R.** Amen.

**Lauda, Hymnus.** Benignitatis fons. *ut supra* **Ÿ.** Eripe me Domine ab homine malo: a viro iniquo, & doloso libera me.

**Supplicatio.**

**O** Remus pium, & exaudibilem Dominum nostrum Jesum Christum, cum omni supplicatione rogemus; ut nos per stigmata passionis suæ propitius justificare dignetur. **R.** Præsta æterne omnipotens Deus.

**Capitula.**

**M**iserere nobis Domine, miserere nobis: & in te confidentes exaudi: adversantium arma confringe; & laqueos nobis destrue præparatos: ut circumdati claritate cœlesti, non incidamus in foveam mortis: sed parato corde tuam in populis exaltemus misericordiam veritatis; qui pro nobis sustulisti obprobrium Crucis.

Pater noster.

**Benedictio.**

**M**ors Christi admirabile sacramentum depellat a nobis omnium conluviones facinorum: **R.** Amen. Sanguis ejus ineffabile pretium extinguat in vos omnium deformitatem vitiorum: **R.** Amen. Crucis ejus insigne vexillum consortes vos efficiat Angelorum. **R.** Amen.

**De Resurrectione Domini Responsorium.**

**H**oc jam tertio manifestatus est Jesus Discipulis suis, cum resurrexisset a mortuis. Alleluia, alleluia. **Ÿ.** Et undecim Discipuli abierunt in Galilæam, ubi constituerat illis Jesus. Et videntes eum adoraverunt. **P.** Cum resurrexisset. **Ÿ.** Gloria, & honor.

**Apocalypsis Joannis Apostoli. Capitulo 1.**

**R.** Deo gratias.

**E**go Joannes servus Jesu Christi fui in spiritu, & audiavi vocem de cœlo dicentem mihi: Ego sum primus, & ego novissimus; & vivus, & fui mortuus; & ecce sum vivens in sæcula sæculorum. **R.** Amen.

**Epistola Pauli Apostoli ad Colossenses. Capitulo 3.**

**R.** Deo gratias.

**F**ratres, Si consurrexistis cum Christo, quæ sursum sunt quærite, ubi Christus est in dextera Dei sedens: quæ sursum sunt sapite, non quæ super terram. Mortui enim estis, & vita vestra abscondita est cum Christo in Deo. **R.** Amen.

**Lauda.** Alleluia, alleluia, alleluia. **Ÿ.** Resurrexit Dominus Jesus Christus: **P.** Alleluia, alleluia. **Ÿ.** Sit gloria illi in sæcula sæculorum. Amen. **P.** Alleluia, alleluia, alleluia.

**Hymnus.**

**J**am surgit hora Tertia,  
Et nos intenti currimus,  
Psallendi opus implemus:  
Christum laudemus Dominum.

**H**ora quoque jam Tertia  
Christus cruce suspensus est,  
Voluntatem Patris implevit,  
Mundi peccatum abstulit,

**C**onscendit sedem propriam,  
Sedet ad Patris dexteram;  
Conlaudant throni Dominum,  
Quem perfidi negaverant.

**N**os Christum Deum colimus,  
Judicemque speramus;  
Quem Prophetæ cecinerunt,  
Apostoli secuti sunt.

**E**gressus hora Tertia  
Sanctus Pater familias  
Per singulos denarios  
Conduxit operarios.

**I**n tua, Christe, vinea,  
Quam præmio jam cernimus,  
Sequimur opus mysticum  
Propter promissum optimum.

**E**cce præcessit jam hora,  
In qua Sanctus Spiritus  
Apostolorum vascula



De verbo fecit ebria.

Infunde sensum, Domine;  
Ut te canamus laudibus:  
Christe, Redemptor omnium  
Sanctifica nostrum chorum.

Gloria tibi Domine,  
Qui surrexisti a mortuis  
Cum Patre, Sancto Spiritu  
In sempiterna sæcula. Amen.

Ÿ. Dominus regnavit a ligno. Alleluia. Etenim cor-  
rexit orbem terræ, qui non commovebitur.

#### Supplicatio.

O Remus pium & exaudibilem Dominum nos-  
trum Jesum Christum, cum omni supplica-  
tione rogemus; ut sicut in hac hora diei Tertia,  
Apostolorum corda Spiritus Sanctus illuminavit, &  
docuit; ita nos indignos, lumine vero propitius il-  
luminare dignetur. R. Præsta æterne omnipotens  
Deus. Kyrie, eleison. R. Christe, eleison.

#### Capitula.

Domine Jesu Christe, Fili Dei Patris, qui hora  
diei Tertia, propter redimendum populum  
tuum te tradi voluisti, & inimicorum colla per po-  
tentiam gloriæ ad nihilum reduxisti: concede nobis,  
atque familiæ tuæ de reatu conscientia veniam, de  
morte vitam; ut te merito inveniamus Redemptorem,  
quem nunc, & per omnia sæcula credimus esse ju-  
dicem, & piissimum Salvatorem.

Pater noster.

#### Benedictio.

Dominus Jesus Christus, qui hora diei Tertia  
misit ad Apostolos suos Spiritum Paraclitum;  
in visceribus nostris innovet Spiritum rectum; R.  
Amen. Et quia mirabile in æquitate permanet Sanc-  
tum, arcana pectoris nostri repleat Spiritus Sanctus:  
R. Amen. Unigenitus Christus Dominus, qui in fa-  
ciem discipulorum suorum flatu vivifico insufflav-  
it, ipse populum suum benedictionibus faciat abundare  
per Spiritum principalem. R. Amen. Per misericor-  
diam.

#### De Ascensione Responsorium.

Quis dabit mihi pennas sicut columbæ, & volabo, ut  
requiescam? Ÿ. Ecce elongavi fugiens: & mansi in  
solitudine. P. Et volabo, ut requiescam? Ÿ. Gloria,  
& honor.

Apocalypsis Joannis Apostoli. Capitula 4.

R. Deo gratias.

Go Joannes servus Jesu Christi fui in Spiritu, &  
vidi: & ecce sedes Dei posita erat in cœlo, &  
supra sedem sedens: & qui sedebat, ipse vocabatur  
Testis fidelis, & immortalis in sæcula sæculorum. R.  
Amen.

Epistola Pauli Apostoli ad Ephesios. Capitula 4.

R. Deo gratias.

Fratres: Qui descendit, ipse est qui ascendit su-  
per cœlos, ut adimpleret omnia. Ipsi gloria, &  
imperium in sæcula sæculorum. R. Amen.

Lauda. Alleluia, alleluia, alleluia. Ascendit Deus  
in jubilatione, P. Alleluia. Ÿ. Ascendit Dominus in  
voce tubæ. P. Alleluia, alleluia, alleluia.

#### Hymnus.

Nunc sancte nobis Spiritus,  
Unum Patri cum Filio,  
Dignare promptus ingeri  
Nostro refusus pectori.

Os, lingua, mens, sensus, vigor,  
Confessionem personent,  
Flammescat igne charitas,  
Accendat ardor proximos.

Præsta, Pater piissime,  
Patrique compar Unice,  
Cum Spiritu Paraclito  
Regnans per omne sæculum. Amen.

Ÿ. Veni Domine, noli tardare: & relaxa facinora  
plebis tuæ.

#### Supplicatio.

O Remus pium & exaudibilem Dominum nostrum  
Jesum Christum, cum omni supplicatione ro-  
gemus; ut nos gloria Ascensionis suæ propitius justi-  
ficare dignetur. R. Præsta æterne omnipotens Deus.  
Kyrie, eleison. R. Christe, eleison.

### INCIPIT ORDO

AD SEXTAM DICENDUS VEL RECITANDUS.

Antiphona. Deus in nomine tuo salvum me fac: &  
in virtute tua libera me. Psalm. 53.

118. Psalmus David.

Feci judicium & justitiam. Mirabilia testimonia tua.  
Justus es, Domine. fol. XX.

Antiphona. Deus in nomine tuo salvum me fac: &  
in virtute tua libera me.

#### Diebus Festivis Responsorium.

In omni loco, dominationes ejus: Benedic anima mea  
Dominum Alleluia, alleluia: Ÿ. Qui sanat omnes lan-  
guores tuos: Qui redemit de interitu vitam tuam. P.  
Benedic anima mea. Ÿ. Gloria, & honor.

#### Diebus Ferialibus Responsorium.

Miserere, miserator: miserere nobis. *Ÿ*. Ad te levamus oculos nostros, qui habitas in coelis. *P*. Miserere nobis. *Ÿ*. Gloria, & honor.

*Diebus Dominicis Responsorium.*

Da nobis Domine lætitiā cordis: & concede pacem in diebus nostris. Alleluia, alleluia. *Ÿ*. Deus in nomine tuo salvos nos fac: & in virtute tua libera nos. *P*. Et concede. *Ÿ*. Gloria, & honor.

*De Adventu Domini Responsorium.*

Hierusalem lætare in Adventu Domini, quoniam ipse veniet tibi. Et auferet a te stolam luctus, & anxietates, & induet te pulchritudinem æquitatis in adventu suo. *Ÿ*. Et ponam visitationem tuam pacem, & præpositos tuos justitiam. *P*. Et auferet a te stolam. *Ÿ*. Gloria, & honor.

*Lectio libri Michææ Prophetæ. Capit. 6.*

*℟*. Deo gratias.

**I**N illis diebus: Locutus est Michæas, dicens: Indicabo tibi o homo quid sit bonum, & quid Dominus quærat a te: utique facere iudicium & justitiam, & diligere misericordiam, & sollicite ambulare cum Domino Deo tuo. *℟*. Amen.

*Epistola Pauli Apostoli ad Romanos. Capitulo 7.*

*℟*. Deo gratias.

**F**Ratres, Infelix ego homo, quis me liberabit de corpore mortis hujus? Gratia Dei per Jesum Christum Dominum nostrum. *℟*. Amen.

*Lauda.* Alleluia, alleluia. Salva, Domine Deus noster: & congrega nos de Gentibus Alleluia: *Ÿ*. Ut confiteamur nomini sancto tuo: & gloriemur in laude tua. *P*. Alleluia, alleluia.

*De Resurrectione Domini Responsorium.*

Videte magnalia Dei, quæ fecit Dominus; confortamini, & nolite timere; *P*. Quia Deus pro nobis pugnat. Alleluia, alleluia. *Ÿ*. Laudate Dominum omnes Gentes: conlaudate omnes populi: *P*. Quia Deus pro nobis. *Ÿ*. Gloria, & honor Patri.

*Hymnus.*

**R**Ector potens, verax Deus,  
Qui temperas rerum vices,  
Splendore mane instruis,  
Et ignibus meridiem.

*Extingue flammās litium,  
Aufer calorem noxium,  
Confer salutem corporum,  
Veramque pacem cordium.*

*Præsta, Pater piissime,  
Patrique compar Unice,  
Cum Spiritu Paraclito  
Regnans per omne sæculum. Amen.*

*In Quadragesima Hymnus.*

**D**Icamus laudes Domino  
Ferventi valde spiritu;  
Hora voluta sexies  
Nos ad orandum provocat.

*Quia in hoc fidelibus  
Vera salutis gratia,  
Beati Agni hostia,  
Virtute crucis redditur;  
Cuius luce clarissima  
Tenebrescit meridies:  
Sumamus toto pectore  
Tantum splendorem gratiæ. Amen.*

*Alius.*

**J**Am cursus horæ Sextæ  
Rotat diei tempore,  
Nos admonet per omnia  
Laudes referre debitas.

*Nunc Petrus orans, Gentibus  
Fidem futuram prospicit:  
Nunc viva Christus feminae  
Instat fluentia tradere.*

*Hoc solis ævo mystice  
Tres Patriarcha hospitat  
Carnis figuræ Nuntios  
Sub Trinitatis numine.*

*Perfecta summi calculi  
Hæc prima constat partibus;  
Quæ ducta sese perficit,  
Tenetque mundi fabricam.*

*Hæc nempe Christe condita  
Manent tua potentia;  
Cujus potestas gloriæ  
Per cuncta regnat sæcula. Amen.*

*Clamores 1. Ne projicias nos, Deus, a facie tua: & spiritum sanctum tuum ne auferas a nobis. 2. Ne projicias. 3. Ne projicias nos. Ÿ. A ruina, & Dæmonio meridiano, Deus sancte custodi nos.*

*Supplicatio.*

**O** Remus Redemptorem mundi Dominum nostrum Jesum Christum, cum omni supplicatione rogemus; ut nobis auxilium de cœlo, & misericordiam suam largam propitius tribuere dignetur. *℟*. Præsta æterne omnipotens Deus.

*Capitula.*

**D**Eus, qui horarum tempora consecras, Sextæ horæ curriculo pro mundi salvatione triumphasti in crucis patibulo; tibi & Ecclesia tua sub hujus sanctificatione temporis, & mentis obsequia defert, & confessionis precamina profert: Proinde rogamus, ut ita hujus celebritatis obsequia tibi depromamus, dum vivimus; ut ad te coronandi mereamur venire post transitum.

Pater noster.

*Benedictio.*

**S**alutare tuum Domine, famulis tuis tribuere dignare; *℞.* Amen. Orationes suscipe: petitiones supple: & peccata dimitte. *℞.* Amen. A languoribus cura, & fidelium pectora a delictorum maculis purga. *℞.* Amen.

*Ad Sextam de Quadragesima Responsorium.*

Averte, Domine, iram tuam a nobis. *P.* Ne in æternum irascaris nobis. *℣.* Mitiga, Domine, omnem iram tuam: & averte ab ira indignationis tuæ. *P.* Ne in æternum. *℣.* Gloria, & honor.

*Lectio libri Joelis Prophetæ. Capitulo 2.*

*℞.* Deo gratias.

**H**æc dicit Dominus: Convertimini ad me in toto corde vestro, in jejunio, & fletu, & planctu. Et scindite corda vestra, & non vestimenta vestra, & convertimini ad Dominum Deum vestrum: quia benignus, & misericors est. *℞.* Amen.

*Epistola I. Joannis Apostoli ad Gentes. Capitulo 2.*

*℞.* Deo gratias.

**C**harissimi: Mandatum novum scribo vobis, quod est verum & in ipso, & in vobis: quoniam tenebræ transierunt, & lumen verum jam lucet. Qui dicit se in luce esse, & fratrem suum odit, in tenebris est usque adhuc. Nam qui diligit fratrem suum, in lumine manet, & scandalum in eo non est. Qui autem odit fratrem suum, in tenebris est, & in tenebris ambulat: & nescit quo eat: quoniam tenebræ obcæcaverunt oculos ejus. Scribo vobis, filioli, quoniam remittuntur vobis peccata propter nomen ejus; cui est honor & gloria in sæcula sæculorum. *℞.* Amen.

*Lauda.* Laus tibi Domine, Rex æternæ gloriæ. Salva nos, Domine, *℣.* Ut confiteamur nomini sancto tuo.

*Hymnus.* Dicamus laudes Domino. *folio*  
XXXXXXX.

*Capitula.*

**A**Ccipe, Domine, sacrificium confessionum nostrarum de manu linguæ nostræ, quam formasti, & excitasti; ut confiteatur nomini sancto tuo: & sana vulnera animæ nostræ, & dicent: Domine, quis similis tibi? Pie enim docet nos, quomodo misereatur ei, qui sibi confitetur. Solve ergo a nobis miseram stridentem catenam vitiorum; & a jugo flagitiorum, quo demersi sumus, nos erue: atque ab intensa confusionis caligine, serenitatis tuæ pius illustra dilectione.

Pater noster.

A malo nos libera. *fol. 9.*

*Benedictio.*

**O**mnipotens Dominus, qui nos per abstinentiam fecit esse devotos, efficiat nos castitate mundissimos; *℞.* Amen. Quique nobis jejunii inspiravit votum, habere tribuat apud se mercedem beatitudinis invenire; *℞.* Amen. Ut simus spiritu fructificantes, qui carnales per jejunium cupimus extinguere voluptates. *℞.* Amen.

*De Traditione Domini Responsorium.*

Eripe me de inimicis meis Domine; quia tu es Deus meus. *℣.* Eripe me Domine ab homine malo: & a viro iniquo libera me. *P.* Quia tu es. *Reiteretur.*

*Aliud Responsorium.*

Placabilis esto Domine, & ostende te nobis in tempore tribulationis, & angustiae nostræ. *℣.* Deus in nomine tuo salvos nos fac: & in virtute tua libera nos. *P.* In tempore tribulationis. *Reiteretur ℞.*

*Lectio libri Threnorum. Capitulo 1.*

*℞.* Deo gratias.

**I**n illis diebus: Dixit Hieremias: Misit inimicus ignem in ossibus meis, & erudit me: expandit rete pedibus meis, & convertit me retrorsum. Justus est Dominus, quia os ejus ad iracundiam provocavit: audite obsecro universi populi: Pars mea Dominus dixit ad animam meam; propterea expectabo eum. *℞.* Amen.

*Epistola I. Joannis Apostoli ad Gentes. Capitulo 3.*

*℞.* Deo gratias.

**C**harissimi: Hæc est annunciatio, quam audistis ab initio, ut diligamus alterutrum. Non sicut Cain, qui ex maligno erat, & occidit fratrem suum. Et propter quid occidit eum? Quoniam opera ejus maligna: fratris autem erant justa. Omnis autem, qui odit fratrem suum, homicida est. Et scimus quoniam omnis homicida non habet vitam æternam in se manentem. In hoc cognovimus charitatem, quoniam pro nobis animam posuit: & nos debemus pro

fratribus animas ponere. **R.** Amen.

**Lauda.** Laus tibi, Domine, Rex æternæ gloriæ. Salva nos, **V.** Ut confiteamur.

**Hymnus.** Jam cursus.

**Clamores.** Ne projicias. fol. XXXXXXXX.

#### Supplicatio.

**O** Remus pium, & exaudibilem Dominum nostrum Jesum Christum cum omni supplicatione rogemus; ut nos per stigmata passionis suæ propitius justificare dignetur. **R.** Præsta æterne, omnipotens Deus.

#### Capitula.

**D** Ic animæ nostræ, Domine: Salus tua ego sum; Quamque cernis imbecillitatis suæ turbari contuitu, non sinas in æterno eloquio: nec deseras nostra intima, dum se iniquitas prodiderit virulenta: Sed nocentes nos, tu judica; tuaque potestate, nos impugnantes expugna.

Pater noster.

#### Benedictio.

**C** Hristus Dominus, qui innocens expansis manibus pendit in ligno, Crucis suæ nos salvificet sacramento. **R.** Amen. Appensione quoque sua sursum nos allevet, qui pro nobis dignatus est exaltari in Cruce; **R.** Amen. Ut vere lucrum sanguinis ejus simus, qui in illo confidentiam cordis nostri dirigimus. **R.** Amen.

### INCIPIT ORDO

#### AD HORAM NONÆ DICENDUS.

**Antiphona.** Dominus solvit compeditos: Dominus erigit elisos. Dominus illuminat cæcos, dirigit justos. **Psalmus 145.** **Psalmus 121.** **Psalmus 122.** **Psalmus 123.**

**Antiphona.** Dominus solvit compeditos: Dominus erigit elisos. Dominus illuminat cæcos, dirigit justos.

#### Responsorium Feriale.

Salvus ero, Domine, si me consolatus fueris, quamvis indignus ego sum. Credo, quia salvabis me. **V.** Domine non sum dignus, ut intres sub tectum meum, sed tantum dic verbo. **P.** Credo, quia. **V.** Gloria, & honor.

#### Aliud Responsorium.

Vivit anima mea, Deus, & laudabit te. **V.** Erravi sicut ovis, quæ perierat: quære servum tuum, Deus; **P.** Et laudabit te. **V.** Gloria, & honor.

#### In Adventu Domini Responsorium.

Lætamini Gentes, & exultate, quoniam veniet Dominus; **P.** Ut clarificet orbem terrarum: & fructus vester erit in jocunditatem. **V.** Nolite ante tempus judicare, quoadusque veniat Dominus; **P.** Ut clarificet.

#### De Resurrectione Domini Responsorium Dominicis diebus.

Mane nobiscum Domine, quoniam jam declinat dies in vesperum. Alleluia, alleluia, alleluia. **V.** Confirma super nos misericordiam tuam: & veritas tua maneat nobiscum; **P.** Quoniam jam declinat dies. **V.** Gloria, & honor.

#### In Ferialibus Resurrectionis Responsorium.

Recordamini qualiter locutus est vobis Dominus: Quia oportet filium hominus crucifigi, & die tertia resurgere. Alleluia, alleluia, alleluia. **V.** Dixit Jesus discipulis suis: Hæc sunt verba, quæ locutus sum ad vos, dum adhuc essem vobiscum. **P.** Quia oportet.

#### Responsorium in diebus Festivis.

Gloria magna est sequi Dominum, quia nihil melius, quam timere illum: nec dulcius, quam respicere in mandatis ejus. Alleluia, alleluia. **V.** Nobis adhærere Deo bonum est: & ponere in Deo spem nostram. **P.** Quia nihil melius. **V.** Gloria, & honor.

#### Aliud Responsorium.

Auxilium meum a Domino, qui fecit cælum & terram. Alleluia. **V.** Levavi oculos meos ad montes, unde veniet auxilium mihi. **P.** A Domino, qui fecit. **V.** Gloria, & honor.

#### Lectio libri Hieremiæ Prophetæ. Capitula 6.

**R.** Deo gratias.

**H**æc dicit Dominus: State super vias, & videte, & interrogate de semitis antiquis, quæ sit via bona, & ambulate in ea: & invenietis requiem animabus vestris. **R.** Amen.

#### Lectio Epistolæ beati Pauli Apostoli ad Colossenses. Capitula 3.

**R.** Deo gratias.

**F**ratres, Charitatem tenete, quod est vinculum perfectionis: & pax Christi exsulet in cordibus vestris, in qua & vocati estis in uno copore: grati estote per fidem, quæ est in Christo Jesu Domino nostro. **R.** Amen.

**Lauda.** Alleluia, alleluia, alleluia. Vivit anima mea, Deus, & laudabit te: **V.** Et judicia tua adjuvabunt me. **P.** Alleluia, alleluia.

#### Hymnus per annum.

**F**Undere preces tempus est;  
Diei cursus admonet  
Canere laudis canticum  
Tibi Redemptor omnium.

Serenam mentem effice;  
Opus honestum perface;  
Preces orantum accipe;  
Vitam perennem tribue.

Præsta, Pater piissime;  
Patrique compar Unice,  
Cum Spiritu Paraclito  
Regnans per omne sæculum. Amen.

#### In Quadragesima Hymnus.

**C**onvexa solis orbita,  
Novem voluta circulis,  
Horæ peracto tramite,  
Ter conficit ternario.

Hoc passionis tempore  
Complevit Auctor omnium;  
Nunc ad laborem vineæ  
Misit vocatos servulos.

Hac Petrus hora mystica  
Claudi resolvit vincula;  
Nunc visionum cognitor  
Terno recurso terminat.

In hac canamus gloriam  
Cum voce, puris mentibus,  
Deo creanti prospera  
Peracta iustis sæcula. Amen.

**Clamor.** 1. Propitius esto iniquitatibus nostris: & sana, Domine, languores nostros. 2. Propitius esto. 3. Propitius esto. Convertere Domine aliquantulum, & repropitiare super servos tuos.

#### Supplicatio.

**O**Remus pium, & exaudibilem Dominum nostrum Jesum Christum, cum omni supplicatione rogemus; ut nobis poenitendi votum, & poenitentiae fructum, & vitæ æternæ remedium propitius tribuere dignetur. **R.** Præsta æterne omnipotens Deus.

#### Capitula.

**D**eus, qui pro mundi salvatione Nonæ horæ curiculo in Crucis stigmatibus glorioso triumphasti miraculo; & perempta morte Sanctorum animas eruens ab infernali ergastulo, viam nobis reserasti, revertendo ad superos: quæsumus, ut ita nostro complacearis obsequio, quatenus illic post transitum properemus gressu perconcito, quo tu nostra præcessisti vera redemptio.

Pater noster.

#### Benedictio.

**S**Alva plebem tuam Domine, quam tu ipse creasti: **R.** Amen. Benedic hereditatem tuam, quam pretioso sanguine redemisti; **R.** Amen. Rege eam, & extolle eam usque in sempiternum, & in sæculum sæculi. **R.** Amen.

#### Responsorium de Quadragesima.

Spes nostra in Deo est, & ipse adjuvabit nos. **Ÿ.** Sperate in eum omnis conventus plebis meæ, & effundite coram illo corda vestra. **P.** Et ipse adjuvabit nos. **Ÿ.** Gloria, & honor.

#### Aliud Responsorium.

Miserere nobis, Domine: miserere nobis. **Ÿ.** Ad te levamus oculos nostros, qui habitas in cœlis. **P.** Miserere. **Ÿ.** Gloria, & honor.

#### Lectio libri Esaie Prophetæ. Capitula 55.

**R.** Deo gratias.

**I**N diebus illis, Locutus est Esaias dicens: Quærite Dominum, dum inveniri potest: invocate eum, dum prope est. Derelinquat impius vias suas, & vir iniquus cogitationes suas, & revertatur ad Dominum, & miserebitur ejus, & ad Dominum Deum nostrum, quoniam multus est ad ignoscendum. **R.** Amen.

Epistola 1. Joannis Apostoli ad Gentes. Capitula 3.

**R.** Deo gratias.

**C**harissimi, Nemo vos seducat. Qui facit justitiam, justus est. Qui facit peccatum, ex diabolo est: quoniam ab initio diabolus peccat. In hoc apparuit Filius Dei, ut dissolvat opera diaboli. Omnis qui natus est ex Deo, peccatum non facit: quoniam semen ipsius in eo manet, & non potest peccare, quoniam ex Deo natus est. **R.** Amen.

**Lauda.** Laus tibi, Domine, Rex æternæ gloriæ. **Ÿ.** Vivit anima. **P.** Et judicia tua. **Ÿ.** Rex æternæ.

#### Hymnus.

**P**erfecto trino numero,  
Ternis horarum terminis,  
Laudes canentes debitas,  
Nonam dicentes psallimus.

Sacrum Dei mysterium

Puro canentes pectore;  
Patris Magistri regulam  
Signo salutis proditam.

Et nos surgamus spiritu

Adhærentes Apostolis:  
Qui plantas habent debiles,  
Christi virtutem diligunt.

Præsta, Pater piissime,



Patrique compar Unice,  
Cum Spiritu Paraclito  
Regnans per omne sæculum. Amen.

**Clamores.** Propitius esto iniquitatibus: Et sana,  
Domine. **Et omnia alia, ut supra præter Capitulam,**  
**quæ sit ista:**

**Capitula.**

**M**iserere nobis, Domine, quia peccavimus tibi; &  
propter duritiam cordis nostri in ipsa pecca-  
torum morte duramus: nos ore, nos corde, nos opere,  
nos omnibus vitiis inquinati veniam poscimus: quia  
crimen agnoscimus; & ut peccati noxam indulgeas  
hujus, prostrati fidem commitantes rogamus.

Pater noster.

**Benedictio.**

**B**enedicat nos Dominus, & propitius nos sanc-  
tificare dignetur: **R.** Amen. Fidem nostram  
roboret promissis donorum cœlestium, & spem nu-  
triat incrementis præsentium gaudiorum. **R.** Amen.  
Ipse nos glorificet præmio æternitatis, qui redimere  
dignatus est pretio passionis. **R.** Amen.

**ORDO ANTE COMPLETORIA**  
DICENDUS VEL RECITANDUS IN  
QUADRAGESIMA.

Quam magnificata sunt opera tua Domine! Omnia  
in sapientia fecisti: repleta est terra creatura tua.  
Quam magnificata sunt opera tua, Domine! Gloria,  
& honor Patri, & Filio, &c. Quam magnificata. Qui  
dat escam omni carni: quoniam in sæculum mis-  
ericordia ejus. Gloria, & honor. Confitemini Deo  
cœli: quoniam in sæculum misericordia ejus. Glo-  
ria. Confitemini Domino quoniam bonus: quoniam  
in sæculum misericordia ejus. Gloria.

**Hymnus.**

**C**ibis resumtis congruis,  
Cœnæ peractis usibus,  
Ad te, Redemptor inclyte,  
Laudes venimus promere.  
**O**ccurre nobis ocyus,  
Tollens cibi gravedinem,  
Corpus parandum ad precem,  
Confessionis dans fidem.  
**U**t quicquid ore promimus  
Tuis sacris in laudibus,  
Nobis coronam conferens,  
Soli Deo dans gloriam.  
**P**ræsta, Pater piissime,  
Patrique compar Unice,

Cum Spiritu Paraclito  
Regnans per omne sæculum. Amen.

**Hic incipiunt Completoria in hunc modum, qui  
sequitur in diebus Festivis.**

**S**ignatum est super nos lumen vultus tui Domine:  
\* dedisti lætitiā in corde meo.

**A** tempore frumenti, vini, & olei, sui, \* multiplicati  
sunt.

**I**n pace in idipsum \* dormiam, & requiescam:

**Q**uoniam tu Domine singulariter in spe \* constituisti  
me.

**G**loria, & honor Patri, & Filio, & Spiritui Sancto  
in sæcula sæculorum. Amen. Alleluia, alleluia, al-  
leluia.

**I**n Quadragesima dicitur Laus tibi: laus tibi  
Domine, Rex æternæ gloriæ.

**E**cce nunc benedicite Dominum, \* omnes servi  
Domini:

**Q**ui statis in domo Domini, \* in atriis domus Dei  
nostri.

**I**n noctibus extollite manus vestras in sancta, \* &  
benedicite Dominum.

**B**enedicat tibi Dominus ex Sion, \* qui fecit cœlum  
& terram.

**G**loria, & honor. Alleluia, alleluia, alleluia.

**I**n Quadragesima. Laus tibi: laus tibi Domine, Rex  
æternæ gloriæ.

**B**enedictus es Domine Deus patrum nostrorum:  
\* & laudabilis, & gloriosus in sæcula.

**D**ignare, Domine, nocte ista, \* sine tribulatione, &  
peccato nos custodire.

**M**iserere nobis, Domine: \* miserere nobis.

**Q**uoniam tu es protector meus, \* in manus tuas com-  
mendo spiritum meum.

**R**edemisti me Domine \* Deus veritatis.

**C**ustodi nos Domine ut pupillam oculi: \* sub umbra  
alarum tuarum protege nos.

**Hymnus.**

**S**ol Angelorum respice,  
Quem concupiscit mentium

Intento visu castitas,  
Sursum manentem cernere.

**Q**uo cuncta pollent cœlitus  
Cursu recurso prospero:  
Quo vita constat omnium,  
Intende grates supplicum.

**D**a servulis custodiam,  
Qua temperentur commoda:  
Adversa sint innoxia;  
Corrupta ne sint pectora.

Frugalitas tu sensuum  
Sator, salus, refectio,  
Potus, cibique, gaudium,  
Lux, atque virtus cordium.

Repelle membris lubricam,  
Ne polluat lascivia;  
Ne fœda vexet passio,  
Culpetque mentis actio.

Virtutis infer copiam,  
Qua conferas clementiam;  
Oblitus ut peccaminum,  
Dones quietem temporum.

Votis rogamus affatim,  
Superna pax inlabere,  
Qua cuncta tuta perpetim,  
Serves subactis scandalis.

Gloria Patri ingenito,  
Gloria Unigenito,  
Una cum Sancto Spiritu  
In sempiterna sæcula. Amen.

Ÿ. Respice, & exaudi me Domine Deus meus. Illumina oculos meos, ne unquam obdormiam in morte.

Psalm. 90. statim sequitur.

**S**Cuto circumdabit te veritas ejus: \* non timebis  
a timore nocturno.

Si ascendero in lectum strati mei: \* memor esto mei, Domine.

Si dederò somnium oculis meis, aut palpebris meis dormitationem, aut requiem temporibus meis: \* memor esto mei, Domine:

Donec inveniam locum Domino, tabernaculum Deo Jacob: \* memor esto mei Domine.

Gloria, & honor Patri, & Filio, & Spiritui Sancto. \* Memor esto mei, Domine.

Sicut erat in principio, & nunc, & semper, & in sæcula sæculorum. Amen; \* Memor esto mei, Domine.

Si ascendero in lectum strati mei: \* memor esto mei, Domine.

Ÿ. Te precor, Domine, auctor lucis, & diei, ne derelinquas me; sed memor esto mei, Domine.

### Hymnus.

**C**ultor Dei memento,  
Te fontis, & lavacri  
Rorem subisse sacrum,  
Te chrismate innovatum.

Fac cum vocante somno,  
Castum petens cubile;  
Frontem, locumque cordis  
Crucis figura signet.

Crux pellit omne crimen:  
Fugiant crucem tenebræ;  
Tali dicata signo  
Mens fluctuare nescit.

Procul procul vagantum  
Portenta somniorum,  
Procul esto pervicaci  
Præstigiator astu.

O tortuose serpens,  
Qui mille per mæandros,  
Fraudesque flexuosas  
Agitas quieta corda:

Discede; Christus hic est,  
Hic Christus est, liquesce:  
Signum, quod ipse nosti,  
Damnat tuam catervam.

Corpus licet fatiscens,  
Jacens reclinet paulum;  
Christum tamen sub ipso  
Meditabimur sopore.

Gloria Deo Patri,  
Et Christo vivo regi,  
Paraclitoque Sancto,  
Et nunc, & in æternum. Amen.

Ÿ. Redimet Dominus animas servorum suorum: & non derelinquet omnes qui sperant in eum.

### Supplicatio.

**O** Remus pium, & exaudibilem Dominum nostrum Jesum Christum, cum omni supplicatione rogemus; ut nos in hac nocte, & in omni tempore Angelica custodia tueatur; & hostem callidum, & cum actibus suis procul a cordibus, & a cubilibus nostris propitius expellere, & effugare dignetur. **℟.** Præsta æterne omnipotens Deus. Kyrie eleison. **℟.** Christe eleison. Kyrie eleison.

### Alia Supplicatio.

**O** Remus Pium, & exaudibilem, &c. ut nos in hac nocte, & in omni tempore de insidiis inimici propitius liberare dignetur. **℟.** Præsta.

### Supplicatio.

**O** Remus pium, & exaudibilem Redemptorem mundi Dominum nostrum, &c; ut nos in hac nocte, & in omni tempore per Angelum suum sanctum ab omnibus adversitatibus inimici, & antiqui serpentis propitius protegere, & conservare dignetur. **℟.** Præsta æterne, &c.

### Capitula.

**R**espice, Domine, super nos, & vigila super oves gregis tui, ne fur nocturnus subripiat, & furetur. Tu es enim, Domine, qui non dormis, neque obdormitas ad custodiendum animas nostras: illumina

cor nostrum lumine veritatis tuæ; ut tua misericordia semper fulgeat in cordibus nostris.

Pater noster.

A malo nos libera. fol. 9.

*Benedictio.*

**G** Regem tuum ne deseras, pastor bone, & visitator animarum. *R.* Amen. Fuga insidiantem lupum, ut nullum in nobis nocendi reperiatur locum. *R.* Amen. Nocturnum furem interdice, Christe, ut oves gregis tui in lumine constituti, integro possint numero permanere. *R.* Amen. Per misericordiam tuam, Deus noster; qui vivis, & omnia regis in sæcula sæculorum. Amen.

Dominus sit. *R.* Et cum Spiritu tuo.

In nomine Domini nostri Jesu Christi perficiamus cum pace. *R.* Amen.

*Finitis Completoriis, omni tempore debent dici ista, quæ sequuntur.*

*Ps.* Custodi nos Domine ut pupillam oculi: sub umbra alarum tuarum protege nos.

*Oratio.*

**S** Alvasti nos, Domine Jesu Christe, per diem vigilantes; custodi nos in hac nocte requiescentes: quod si nos obdormierimus, Spiritus tuus Sanctus vigilet super nos; & custodiat in hac nocte, & in omni tempore. Amen. Per misericordiam tuam.

Dominus sit. *R.* Et cum.

In nomine Domini nostri Jesu Christi in hac nocte dormiamus, & requiescamus cum pace. *R.* Deo gratias.

Pater noster.

*In diebus vero Sabbatorum vel præcipuarum festivitatum, finitis in ordinem Psalmis Completorii secundum usum modernorum, ut dictum est, dicitur istud Responsorium, & alia quæ sequuntur.*

*Responsorium.* Gregem tuum ne deseras, Pastor bone, qui dormire nescis in vigilia: *Ps.* Et ne nocturnis terroribus fatigemur, coeleste super nos velamen prætende, *P.* Qui dormire nescis. *Ps.* Gloria, & honor. *Duplicatur Responsorium.*

*Lectio libri Ezechielis Prophetæ. Capitulo 34.*

*R.* Deo gratias.

**H**æc dicit Dominus: Salvabo gregem meum, & non erit ultra in rapinam; & ideo judicabo inter pecus, & pecus. Et cessare faciam bestias pessimas de terra. Et qui in desertis habitant, securi dormient, ait Dominus omnipotens. *R.* Amen.

*Epistola Pauli Apostoli ad Philippenses. Capitulo*

*R.* Deo gratias.

**F** Ratres: Petitiones vestræ innotescant apud Deum. Et pax Christi, quæ exuperat omnem sensum, custodiat corda, & corpora vestra, & intelligentias vestras, per fidem, quæ est in Christo Jesu Domino nostro. *R.* Amen.

*Lauda in Quadragesima.*

Laus tibi, laus tibi, Domine Jesu Christe: Illumina Domine oculos nostros, ne unquam obdormiamus in morte: *Ps.* Confirma super nos, Deus, misericordiam tuam: & veritas tua manet nobiscum in æternum. *P.* Jesu Christe.

*Lauda de Traditione Domini.*

Laus tibi, laus tibi Domine, Rex æternæ gloriæ. Salva plebem tuam, Domine Rex æternæ gloriæ; *Ps.* Rege eam Domine, Rex æternæ gloriæ: *P.* Quam redemisti tuo sanguine. *Ps.* Laus.

*Hymnus.*

**O**bsidiones obvias  
Paremus omnes carminum,  
Contra tenebrarum ducem,  
Contra tetrum satellitem.

*Manus perarmet spes, fides;*

Lumbos, valens Crux obtegat:

Cingamur ense spiritus

Propter timorem noctium.

*Jesu manu fortissima*

Salva fideles per fidem,

Everte adversos Cruce,

In pace cuncta protege.

*Hymnus.*

**A**dsunt tenebræ primæ;  
Noctis tetrae excursus  
Cum canticis, & hymnis  
Nunc dedicemus omnes.

*Nam tempus illud hoc est,*

Quod Hieremias dicit:

Surgendum esse nobis

Primordio in noctis.

*Nos spiritu per arma,*

Invicta radix David;

Disrumpe vincla noctis,

Et da jubar salutis.

*Somni quies sit grata:*

Mens pervigil resurgat:

Non sordidemur actu;

Nec spiritu gravemur:

*Sed corpore, & mente*

Spiritu fervente,

Vestigio impigro

Te consequamur, Christe.

### Hymnus.

**N**octis tetræ primordia  
In laudibus transegimus:  
Nunc te precamur, Trinitas;  
Ut præcinentes audias.

**T**u omnibus da gratiam;  
Tu fessa quoque alleva,  
Errata dele criminum,  
Exclude jube scandalum.

**L**ux vera nos inluminet,  
Mentis tenebras effuget;  
Ut pax abundet omnibus,  
Qui te, Creator, credimus.

### Alius Hymnus.

**Q**uieti tempus adest,  
Quod fessa membra quies  
Obtineat innocens,  
Et Christo vigilet mens.

**P**elle a nobis, Deus,  
Rogamus, omne tetrum;  
Anguis prisci malignum,  
Virusque mortiferum.  
**U**t sub umbra alarum  
Tutissima tuarum  
Protecti maneamus,  
Ad tuasque laudes surgamus.

**S**it gloria, & potestas  
Deo Patri, & Proli,  
Paraclito coæquali  
In sæculorum sæcula. Amen.

### Psalmus 50.

Cum gloria, &c.

Ÿ. Scuto circumdabit te veritas ejus: non timebis  
a timore nocturno. Kyrie eleison. Christe eleison,  
Kyrie eleison.

Pater noster. Deus, miserere.

### Hymnus in Quadragesima dicendus.

**L**ucis auctor clemens, lumen immensum:  
Lumen, cujus fulget Sanctus æternus  
Christus, cum quo regnat cum ipso in unum  
Et Sanctus Spiritus, una potestas.

**T**etræ noctis hujus caliginem pelle,  
Serpentisque fraudes, quæsumus, fuga:  
Nos armatos Crucis signaculo salva:  
Sacrosancto tuo nomine dita.

**Q**uos peccati mole gravide pressos,  
Sua milleformis fraude decepit,  
Se victorem gaudens, quoque se victum  
Cognoscat virtute Omnipotentis.

**P**ater immortalis, omnium Pastor,  
Invidentem hostem frange fuscantem;  
Lumen nobis præbe perenne de Sancto:  
Tenebroso calle non paveamus.

**R**edemptor æterne, Rex omnis terræ,  
Delictorum pius gemitus adtende:  
Insidiantem hostem confringe Salvator;  
Nos æternæ vitæ redde beatos.

**N**octem nobis istam dona quietam:  
Inimicum hostem fuga a nobis;  
Crucis signum vincat omne iniquum:  
Te, Christe, rogamus, mane nobiscum.

**G**loria, & honor, potestas, & virtus  
Ingenito Deo, genitoque Christo,  
Spirituque simul Paraclito Sancto;  
Cujus verbo clarent sæcula cuncta,  
Amen.

**Psalmus 50.** Ÿ. Scuto.

### Hymnus dicendus diebus Dominicis.

**C**hriste, qui lux es, & dies,  
Noctis tenebras detege:  
Lux ipse lumen præferens,  
Vitam beatam prædicans.

**P**recamur, Sancte Domine,  
Defende nos in hac nocte:  
Sit nobis in te requies,  
Quietam noctem tribue.

**N**e gravis somnus inruat,  
Nec hostis nos subrepat;  
Nec caro illi consentiens,  
Et nos reos statuatur.

**O**culi somnium capiant:  
Cor ad te semper vigilet:  
Dextera tua protegat  
Famulos, qui te diligunt.

**D**efensor noster aspice,  
Insidiantem reprime:  
Guberna tuos famulos,  
Quos sanguine mercatus es.

**M**emento nostri Domine  
In gravi isto corpore;  
Qui es defensor animæ,  
Adesto nobis Domine.

**T**etræ noctis insidias  
Hujus timoris libera:  
Tuæ lucis magnalibus  
Totum Clerum inlumina.

**G**loria Patri ingenito,  
Gloria Unigenito,  
Una cum Sancto Spiritu,

In sempiterna sæcula. Amen.

Psalmus 50. **V̇.** Scuto circumdabit te veritas ejus: non timebis a timore nocturno. Kyrie eleison. Christe eleison. Kyrie eleison. Pater noster. Et ne nos. Sed libera nos a malo.

Deinde dicantur Miserationes in qualibet Feria, pro ut sequuntur per ordinem in secunda, & tertia, & quarta, quinta, sexta, & sabbato Feria. Et quia capitulæ præcedunt Miserationes: ideo sic ordinantur, prout debent dici in qualibet Feria.

#### Secunda Feria, Capitula.

**N**octem nostram illumina, æterne omnipotens Deus, effice nos famulos tuos obdormire quietibus, & virtutibus Sanctorum excitare; ut ab omni inquietudine tenebrarum, te auxiliante, ad diem clarum pervenire mereamur.

Pater noster.

#### Benedictio.

**C**Rux Domini nostri Jesu Christi a timore nos defendat inimici. **R̃.** Amen. Lux veritatis expellat a nobis omnes tenebras cæcitatibus; **R̃.** Amen. Ut ejus illuminatione salvati, æternam benedictionem percipere mereamur. **R̃.** Amen.

#### Tertia Feria, Capitula.

**D**eus, lumen æternum, splendor siderum, claritas noctium, illuminatio incomprehensa tenebrarum da nobis hanc noctem securam, tranquillam, ac quietam; & siqua hodie peccata contraximus, tu pius, & misericors indulge propitius: preces quoque famulorum libenter exaudi, & postulata concede.

Pater noster.

#### Benedictio.

**M**Anus Dei Patris omnipotentis auxilietur nobis; **R̃.** Amen. Brachium sanctum ejus confortet nos. **R̃.** Amen. Nihil in nobis prævaleat inimicus: **R̃.** Amen. Sed in omnibus nobis aurem suam inclinet Dominus noster Jesus Christus. **R̃.** Amen.

#### Quarta Feria, Capitula.

**S**Iqua, Domine, in die peccata contraximus opere, sermone, & cogitatione: tu dimitte: & hanc nobis noctem tranquillam, pacificam, ac sine peccato concedere digneris.

Pater noster, qui es.

#### Benedictio.

**D**ominus Jesus Christus, qui nos redemit: in hac nocte custodiat: **R̃.** Amen. Sanctificet corda, & corpora nostra; **R̃.** Amen. Et in bonis actibus compleat desideria nostra. **R̃.** Amen.

#### Quinta Feria, Capitula.

**C**ustodi, Domine, animas nostras, ac de manu tentatoris erue: elonga a nobis nocturnum furem, & insidias falsitatis ejus a nobis repelle; quia milleformis in nocturnis temporibus adest, quærens decipere dormientem, quem vigilantem superare non potest. Sed tu, Domine, ut bonus pastor, ac piissimus gubernator, gregem tuum ne deseras: animam tuam pro ovibus posuisti; & quos tuo pretioso sanguine redemisti, salva nos.

Pater noster, qui es.

#### Benedictio.

**G**regem tuum, Pastor bone, placatus adtende: & hos famulos tuos de tuis benedictionibus reple. **R̃.** Amen. Columitatem mentis, & corporis tribue: & perpetuam salutem concede. **R̃.** Amen. Dona nobis tempora quietas, & pacificas; ut tibi serviamus mente devota. **R̃.** Amen.

#### Sexta Feria, Capitula.

**C**ustodi nos quiescentes in hac nocte, & velociter exaudire digneris, quas coram te fundimus preces; & ut in tenebris non timeamus inimicum tentatorem, circumvalla nos fortitudinis Cruce.

Pater noster.

#### Benedictio.

**B**enedictionum suarum super nos Dominus imbrem infundat; & Trinitas inseparabilis a nobis numquam recedat. **R̃.** Amen. Angelica visitatione nos protegat, & nocturnum furem de cubilibus nostris expellat: **R̃.** Amen. Ut cingulo castitatis adstrictos, in nulla nos ludificationis suæ arte deterreat inimicus. **R̃.** Amen.

#### Sexta Feria, Capitula.

**C**ustodi nos, Domine, sicut exaudire, & custodire dignatus fuisti sanctum Danielem orantem in lacu leonum, & non tetigerunt illum bestię; quia fortissima eum tua tegebat dextera: feræ feroces ante eum se solvebant, & odorantes fugiebant: Fulgeat in nobis, Domine, tuus Christus; & fugiat a cordibus, & a cubilibus nostris perfidus inimicus.

Pater noster.

#### Benedictio.

**O**mnipotens Deus, qui es lumen æternum; inlabere, quæsumus, sensibus famulorum tuorum: **R̃.** Amen. Custodi gregem tuum; & lupum insidiatorem repelle. **R̃.** Amen. Omnium corda, & pectora conserva; & nocturnum furem cum Angelis suis ab eis procul effuga. **R̃.** Amen.

#### Sabbato, Capitula.



**A** Move a nobis, Domine, scandalum noctis; ut non timeamus ambulare in medio umbræ mortis: apprehendat nos virga tua, & baculus tuus: virga Jesse per Beatam Mariam: ipse nos perducat ad vigiliam matutinam, qui nos docuit orare, & dicere:

Pater noster, qui es.

*Benedictio.*

**E**Xaudiat nos Dominus, & benedicat. *℞.* Amen. Protegat ab hoste callido, & ab omni malo defendat; *℞.* Amen. Et sub umbra alarum suarum, nos in hac nocte, & in omni tempore custodiat. *℞.* Amen.

*His peractis, qualibet die totius anni, finitis Completoriis in hunc modum, ante aspersionem aquæ benedictæ, debet dici iste Versiculus, qui sequitur, & Oratio, quæ sibi jungitur.*

*℣.* Custodi nos, Domine, ut pupillam oculi: sub umbra alarum tuarum protege nos.

*Sequitur Oratio.*

**S** Alvasti nos, Domine Jesu Christe, per diem vigilantes; custodi nos in hac nocte requiescentes: quod si nos obdormierimus, Spiritus tuus Sanctus vigilet super nos; & custodiat in hac nocte, & in omni tempore, & maneat semper nobiscum. *℞.* Amen. Per misericordiam tuam, &c.

Dominus sit semper vobiscum. *℞.* Et cum Spiritu tuo.

In nomine Domini nostri Jesu Christi in hac nocte dormiamus, & quiescamus cum pace. *℞.* Deo gratias.

*Et quando spargitur Aqua benedicta super altare, dicat Presbyter:* Benedicat vos Pater, & doceat Filius, & illuminet Spiritus Sanctus. *℞.* Amen.

*Et quando spargitur Aqua benedicta fidelibus Christianis, debet Presbyter dicere:* Gratia Sancti Spiritus mundet vos a delictis omnibus. *Vel sic:* Filius Dei Patris omnipotentis purget vos omnibus inquinamentis.

*Secunda Feria, Miserationes.*

**M**iserere nobis, Deus, miserere nobis. *P.* Miserere nobis, & esto placatus. *℣.* Audi pie, Rex æternæ, preces supplicantium, & averte iram. Facinus remitte cunctis, & quietem dona populo fidei. *P.* Miserere nobis Deus: *℣.* Omnes simul te precamur, Jesu bone Deus, adtende misertus nostri, precibus exoratus: & quæsitæ præbe populo tuo fidei. *P.* Miserere nobis Deus: *℣.* Præbe pacem, da quietem, & tranquillitatem temporum. Precamur:

mitte Angelum salutis, & precantibus fave de tuis excelsis. *P.* Miserere nobis Deus. *℣.* Esto nobis, Deus pie, jugiter defensor, simul & protector: sume arma, & exurge, & fer opem nobis, & adesto clemens. *P.* Miserere nobis Deus.

*Tertia Feria, Miserationes.*

**M**iserere Miserator, & esto placatus: miserantem te ostende, & peccata dimitte: ex Maria natus homo, in natura Deus, *P.* Remitte iniquitates, quas tibi peccavimus: *℣.* Per quem te semper in cœlis credimus regnantem; ita careamus malis, te auxiliante. *P.* Remitte iniquitates. *℣.* Te rogamus, te precamur, Sancte pie Deus; ut nos respicias, Christe, miseros placatus. *P.* Remitte. *℣.* Grex tuus tibi fatetur mala, quæ commisit: tu Pater Sancte, ab hostis voratu. *℣.* Aggravati sumus: nostra peccata ploramus: non sinas, quod adquisisti, ab Angelis deleri. *℣.* Ecclesiæ catholicæ totius conventus ad te proclamantes: præbe pietatis locum. *℣.* Peregrinis, sive egenis patriam redde: ægris pristinam salutem, defunctisque requiem.

*Quarta Feria Miserationes.*

**M**iserere Domine, miserere nobis: tibi soli peccavimus, *P.* Indulge nobis, rogamus. *℣.* Lapsi sumus graviter in peccatis magnis; veniam precamur. Christe parce nostris delictis. *℣.* Scelus flemus admissum; non reddas, ut meremur. Pater pie, dele noxam, & peccata relaxa. *℣.* Pœnitentibus conversis redde cor contritum: & elisis jam succurre, Rex cœlestis. *℣.* Pauperibus, egenis, itinerantibus, naufragis, lapsis, viduis, pupillis jam succurre, Rex cœlestis. *℣.* Peregrinis, oppressis, dispersis, & captivis, vinctis, ægris, & defunctis jam succurre, Rex cœlestis. *℣.* Si peccavimus in te, tui sumus, Deus, expectantes, Domine, misericordiam tuam. *℣.* Quid est homo, Domine, ut ei indigneris: aut genus corruptibile, ut ita de ipso amare irascaris? *℣.* Nemo de genitis est, qui non impie gessit; nec de confitentibus, qui tibi non deliquit. *℣.* In hoc nuntiabitur bonitas tua, Deus, cum misertus fueris iniquitatibus nostris.

*Quinta Feria, Miserationes.*

**M**iserere, miserere, *P.* Domine: nos peccavimus; tu dimitte, *P.* Domine. *℣.* Nos erramus; tu emenda, *P.* Domine. *℣.* Pro infirmis te precamur, *P.* Domine. *℣.* Pro defunctis te rogamus, *P.* Domine. *℣.* Pro captivis te rogamus, *P.* Domine. *℣.* Pro itinerantibus te postulamus, *P.* Domine. *℣.* Pro navigantibus te precamur, *P.* Domine. *℣.* Pro pœnitentibus te exoramus, *P.* Domine. *℣.* Indulgentiam postulamus, *P.* Domine.

*Sexta Feria, Miserationes.*

**D**omine, miserere nobis: Domine, miserere nobis; *P.* Et averte iram tuam a nobis. *Ÿ.* Domine, audi lachrymantes; Domine, veniam petentes; *P.* Et averte. *Ÿ.* Domine, pupillorum precibus subveni misertus, & clemens; *P.* Et averte. *Ÿ.* Domine, propter temetipsum suscipe singulorum preces; *P.* Et averte. *Ÿ.* Domine, ne spernas plebem; qui tuam pietatem exquirunt; *P.* Et averte iram.

*Sabbato, Miserationes.*

**M**iserere, miserere, miserere, Jesu bone. *P.* Peccatis nostris finem pone: *Ÿ.* Audi pie, & intende, & gementes consolare, Pater pie, Rex æterne. *Ÿ.* Auctor noster, & Redemptor, plebis tuæ sis protector, peccatorumque indultor. *Ÿ.* Prostrati omnes rogamus: ut agnoscas, supplicamus; ut dimittas, exoramus; *Ÿ.* Qui pro nobis formam servi induere voluisti, pœnitentes jam exaudi; *Ÿ.* Qui latronem confitentem paradiso collocasti; & alium condemnasti; *Ÿ.* Qui pro nobis sustulisti passionem quoque Crucis, jam memento servis tuis. *Ÿ.* Cruce tua jam protege, quos per eam redemisti: dextera tua jam custodi; *Ÿ.* Qui Lazarum jam putentem de sepulchro suscitasti, oves tuas tu custodi. *Ÿ.* Rex æterne, Jesu bone, a macula nos absolve, & in bonis nos confirma; *Ÿ.* Defunctis dona requiem: dona paradisum: colloca vinctos Sanctorum catervæ.

*In tempore Traditionis Domini, Miserationes.*

**D**eus miserere, Deus miserere, miserere Deus, miserere. *P.* Christe miserere: *Ÿ.* Tu cæcis lumen, surdis auditum, mutis eloquium, atque claudis gressum, virtus debilium: *Ÿ.* Tu pastor & ovis in via salutis: tu passus pro nobis: tu victor perennis: Christe, parce nobis. *Ÿ.* Audi viduas: rege pupillos: orphanis, & vinctis, fidelibus cunctis, solamen tribue. *Ÿ.* Adtende, & audi precantes: subveni: furorem remove: præsidium præbe, Redemptor æterne.

*Oratio.*

**M**iserere nobis Domine, miserere nobis: & iniquitatumstrarum clemens copiam digneris abolere: ut quicquid, suadente inimico, in hujus diei spatio, cogitatu, dicto, vel facto deliquimus, tu qui pius es, & misericors, indulge propitius: ut nocturnam evadentes decipulam, ad constitutum ministeriorum ordinem exurgentes, laudationis tibi jubulum persolvamus indemnes. *R.* Amen.

*Oratio.*

**M**iserere nobis Domine, miserere nobis: & pupillis, atque egenis, elisis, seu peregrinis, moestis, ac lapsis solamen tribue clemens: oppressos releva, dispersos congrega, captivos revoca, infirmos visita, pœnitentibus, reisque dele crimina: & universis christianis congrua largire subsidia; itinerantibus, & vinctis, seu fidelibus cunctis sospitatem animarum & corporum, accumula: innumerosa nostra dele scelera; & propter magnam misericordiam tuam defunctis omnibus sempiternam requiem dona. *R.* Amen.

*Et istæ duæ Orationes debent dici in tempore Quadragesimali post Miserationes; una ipsarum una die, & altera in alia die: & his finitis, Presbyter debet spargere Aquam benedictam, ut supra dictum est.*

*Sequitur Benedictio mensæ.*

*Ÿ.* Oculi hominum in te sperant Domine: & tu das escam illis in tempore opportuno. *Ÿ.* Gloria, & honor. *Ÿ.* Aperis tu manum tuam: & imples omnem animam benedictione. *Ÿ.* Gloria & honor. *Ÿ.* Edent pauperes, & saturabuntur: & laudabunt Dominum qui requirunt eum: & vivet cor eorum in sæculum sæculi. *Et hic non dicitur Gloria;*

*Et sic accedens Minister, qui panes mensæ intulit, & imponit hunc versum:*

Qui dat escam omni carni: quoniam in sæculum misericordia ejus. Gloria, & honor Patri, & Filio, & Spiritui Sancto: Sicut erat in principio, & nunc, &c.

*Benedictio.*

**S**anctifica, Domine, hanc escam & potum, quæ sumpturi sumus: ut per manus sancti Angeli tui sanctificata, utraque sumere mereamur. *R.* Amen. Per misericordiam tuam, Deus noster; qui vivis, & omnia regis in omnia sæcula sæculorum. Amen.

In nomine Domini nostri Jesu Christi; sanctificationem, & benedictum: reficiamur cum pace. *R.* Deo gratias.

*Et dum prandium, vel cœna fit, omnes silentium debent habere: & inter Regulares personas liber regulæ debet legi, ne fabulæ vulgares intermittantur: quo prandio peracto, vel cœna imponitur ista Lauda:*

Vox lætitiæ & salutis Alleluia *P.* In tabernaculis justorum. Alleluia, alleluia. Ecce quam bonum, & quam jocundum, habitare fratres in unum. *P.* In tabernaculis justorum. *Ÿ.* Gloria, & honor Patri. *P.* In tabernaculis.

*Imponitur iste versiculus.*

Refecisti nos Domine in factura tua: & in operibus manuum tuarum exultabimus. *Ÿ.* Gloria, & honor Patri.

Oratio.

**T**ibi gratias agimus, & te benedicimus, Domine Jesu Christe: qui nos satiare dignatus es esca & potu carnali; refice nos dono spirituali, & libera nos ab omni nexu peccati; ut tibi semper serviamus illæsi. **R̃.** Amen. Per misericordiam tuam, Deus noster; qui vivis, & omnia regis in sæcula sæculorum. **R̃.** Amen.

In nomine Domini nostri Jesu Christi: Dominus abundare faciat servis suis omni benedictione, & pace. Amen. **Ṽ.** Semper lætitia in domo ista cum fratribus istis. Amen.